

Regional News Unit AIR Aizawl

Thursday, June 13, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoman Hlimen leh Melthum leimin tuar leh hmun him lova awm insawnchhuah lailawk ngai te tan Transport Department ramah Temporary Relief Camp a rang lama sak a nih tur thu a sawi.
- Mizoram State Commission for Protection of Child Rights chuan Mizoram chhunga naupang kumtling lo hnathawh luh tir an awm lohna turin theihtawpa hma an lak thu an sawi.
- Kuwait-a Labour Housing facility kangah India mi 40 an thi a, midang 50 chuangin hliam an tuar.
- Prime Minister Narendra Modia chuan naktukah Italy-a G7 Summit-a tel turin vawiin hian Apulia khua a thleng dawn.

<><><>

CM

Chief Minister Pu Lalduhoman Hlimen leh Melthum leimin tuar leh hmun him lova awm insawnchhuah lailawk ngai te tan Transport Department ramah Temporary Relief Camp a rang lama sak a nih tur thu a sawi a, he hmunah hian nakum January thla thlenga an chen lailawk theih tur thu a sawi.

Nimin khan Chief Minister hian a office-ah Hlimen leh Melthum leimin tuar leh hmun him lova awm insawnchhuah lailawk ngai te aiawh hruaitute a kawm a. MLA Pi Baryl Vanneihsangl Tlau chuan a tawiawm a.

Heng hmun him lova cheng, insawn lailawk ngaite hi School building leh hmun remchangah an invawm lut rih a. Zirna hi a pangaia a kal chhoh leh tawh dawn avang te, AMC Bye Election neih huna Polling Station a hman tur te a ni a. Chuvang chuan Relief Camp ngaihtuah ran tul an tih thu Chief Minister hnenah hian an thlen a ni.

Chief Minister hian DM & R lamin Camp sakna tur sum pawh an kawh reng tawh tih sawiin, hna an tan nghal mai tur thu a lo hrilh a. Chhungkaw insawn ngai zawng zawng te chu buhfai bag khat theuh a pek ve tur thu pawh a lo hrilh a ni.

Leimin tuartute sawi danin chenna in 46 a khawsa chhungkaw 69 vel te hmun him lam panin an inthiar chhuak a ni.

<><><>

P&E MEETING

Mizoram chhimlam in kawlphetha mumal leh tha zawk an neih theih nan a hmalakna kal mek leh hmalak dan tur chungchanga inrawnkhawmna chu nimin khan Power & Electricity Department buatsaihin P&E Lawngtlai Division Pisa-ah neih a ni.

He hun hi Lunglei Power Circle Superintending Engineer Pu Lalrinmawia hova neih a ni a, Lawngtlai a tlawmngai pawl hrang hrang, Central YLA, Lai Women Association, MHIP, Mizoram Upa Pawl, Lai Students Association, Lawngtlai District Students Association leh Mizoram Journalist Association Lawngtlai District aiawhte an tel.

Inrawnkhawmna-ah hian chhimlam, a bikin Lawngtlai leh Siaha District chawm tura hmalakna kal mek, Khawiva leh Lawngtlai inkara power line awmsa 132KV line ti lian tura hmachhawp awm chu hnathawh a nih tak tak hunah mipui tawrhna thlen tlem zawnga hnathawh a nih theih dan tur te sawiho niin, chhun lamah karkhat ah ni thum / ni li chung emaw kawlpheha ti-tawpa hnathawh ni se, zanlam ah eng pek ni thin se tiin ngaihdan thawhkhawm a ni a, a zirchian hna thawk tur leh a theih dan kawng dap turin thukawm chuan P&E Department-te an ruat a ni.

He inrawnkhawmna hunah hian Lawngtlai bul Chawnhu a 132Kv Sub Station bun mek pawh kumin chhunga zawhfel hman beisei a nih thu sawi lan a nih bakah, he lai thlunzawm tur hian Khawiva atanga power lakna chu tihchangtlun chhoh a ngaih thu te, hnathawh tan tak tak a nih hunah Lawngtlai leh Siaha a kawlpheha pekchhuah kawngah khaih lak a awm dawn avanga mipuite pawhin an hriatthiam a ngaih tur thu sawi lan a ni bawk.

Siaha Mizoram Journalists' Association (MJA) te chuan nimin vek khan Siaha P&E Division Executive Engineer Pu Vanlalhlenga chu a office ah kawmin Siaha District Power Supply dinhmun an sawipui a,

MJA Siaha te chuan Siaha District Power dinhmun leh harsatna an tawh thin dan te leh rawtna an neihte sawiin EE chuan an harsatna lian ber Lawngtlai chawnhu 33 KV station chu 132KV dawng thei tura thuam mek a ni a, kumin ah zawh hman beisei a ni a, Chawnhu atangin Siaha 33KV station ah tunhma a Khawiva atanga thui tak 33KV ang a lo kal thin power nasa taka tlahniam thin chu a tikhian beisei a nih thu a sawi.

Tuipang Mini Hydel project 3MW pechhuak thei tur pawh siamthat thawh zawh tawh a ni a, hei hian nasa taka a puiah a beisei thu a sawi.

<><><>

KOLASIB MISSION SHAKTI MEETING

Women & Child Development kaltlang a hmeichhiate sahimna leh an dinhmun chawikan zel a nih theih nana ruahman Mission Shakti hnuai hmalak dan tur relin nimin khan Kolasib DC Conference Hall-ah District Level Implementing Committee on Mission Shakti chu an thutkhawm a. He hun hi DC Pu John LT Sanga chuan kaihruaiin, Pi Lalhlengkimi, Child Development Project Officer (CDPO), Bilkhawthlir chuan Mission Shakti hnuai a hmachhawp hrang hrangte a tarlang.

Meeting ah hian District Office hrang hrangte nen tangkawp a hmeichhiate dinhmun chawikanna kawng a thiam thil an neih theih nan 'Skill Development Training' kalpui dan tur te, sum peipun leh vawn dan felfai nei tur a 'Financial Literacy Program' buatsaih dan tur leh tunlai khawvel changkanna ina a ken tel thiamna hrang hrang tangkai tak a an hman ve theih nan 'Digital Literacy Program' kalpui dan tur te rel a ni a. Hriselna kawng a hmeichhia ten hma an sawn zel theih nan 'Awareness on Sexual Reproductive Health and Menstrual Hygiene' leh 'Mental Health Program' buatsaih dan tur te, hmeichhiate sahimna tur a dan siam hrang hrang inzirtirna atan a 'Legal Awareness Program' kalpui dan tur leh Pradhan Mantri Matru Vandana Yojana chungchang inhrilhhriatna hun neih dan tur te rel a ni.

Pi Zonunpuii, Specialist in Financial Literacy chuan Kolasib district hnuai a Women & Child Development hnuai a hmalakna hrang hrang tarlangin hmeichhe dinhmun tleu palh ten lei rem rap tur a insiamthatna hun leh hmun tha an neih theih nan One Stop Centre leh Shakti Sadan buatsaih a nih thu te, hmeichhia harsatna tawh ten engtik lai pawh a tanpuina an dawn theih nan Women Helpline ruahman a nih dan te ngaihthlak a ni a. Kumin January atang a May thleng khan PMMVY hnuai a hmthatna dawng mi 195 an awm tawh thu tarlan niin hmeichhiate sahigna turin khawtlang hruaitute nen veng tin ah 'Community Watch Group' din tur a hmalak mek a nih thu ngaihthlak a ni bawh.

Meeting ah hian Kolasib Addl. DC Pi Melody Ngurthantluangi leh head of office engemaw zat an tel.

<><><>

CHILD RIGHTS

Mizoram State Commission for Protection of Child Rights chuan Mizoram chhunga naupang kumtling lo hnathawh luih tir an awm lohna turin theihtawpa hma an lak thu an sawi.

He thu hi nimina Aizawl Press Club-a chanchinbu mite nen inkawm honaah MSCPCR hotute chuan sawiin, tun dinhmunah naupang hnathawh luih tir case record la awm rih lo mahsela diklo taka naupang chhawr hmuh tur erawh an awm fo thu an sawi a, diklo taka naupang chhawr kawngah Mizoram chu a fihlim tihna lam a nih loh thu leh Mizo mipuiten an la ngaihven tawh loh vang zawk anih thu an sawi bawh.

MSCPCR hotute chuan nimen June ni 12 kha khawvel pum huap International Labour Organisation-in a 'World Day Against Child Labour Day'-a a puan thu leh hun lo la kal zel tur atan naupangten an dikna chanvo an chan a diklo taka naupang hnathawh luih tir a awm lohna atan Mizoram mipuite thawhpuih an sawm a ni.

Mizoram State Commission for Protection of Child Rights hruaitute chuan tun hnaiah ND&PS Act hnuai Excise and Narcotics ten kum tlinglo 13 an man chu a pawh an tih thu leh kumtlinglo hetiang thil tih tirtu te chu an dem thu an sawi bawh.

<><><>

BY-ELECTION @ SIAHA

Mara Autonomous District Council (MADC) hnuai by-election neihna tur MDC Constituency pakhat leh Village Council Constituency pathum ah te June ni 28 ah vote thlak tur a ni,

State Election Commission chuan nimen khan puangin, By election a ding turte hming pek luh theih hnunung ber atan June ni 18 a ruat a, a tukah hming pek luh te endik a ni anga, inhnuk dawh duhte tan in-hnuh dawh hun hnunung ber July ni 21 a ni anga, July ni 2 ah vote chhiar a ni ang.

Mizoram State Election Commissioner, Pu Laima Chozah chuan n inthlan hun puan ni atanga vote thlak leh chhiar fel a nih a, a tlingte certificate pek an nih thlenga Model Code of Conduct (MCC) khauh taka kalpui a nih tur thu a sawi.

By Election hi Chakhei MDC Constituency-ah leh Village Council pathum, New Siaha East -II, Lopu leh College Vaih-III –ah te neih a ni ang.

<><><>

KUWAIT

Kuwait-a Labour Housing facility kangah India mi 40 an thi a, midang 50 chuangin hliam an tuar. External Affairs Ministry sawidanin kangmei chhuahna hmun hi Mangaf area a ni a. Indian Embassy chuan Kuwait thuneitute hnen atangin chhiatna thlen dan kimchang an buaipui zui nghal a ni.

Sawrkar laipui sawidanin hliam tuarte sawrkar damdawiin pangaah dahluh an ni a. A tam zawk chu an dinhmun a tha nia hriat a ni.

Kuwait-a India palai Adarsh Swaika chuan chhiatna thlenna hmun hi a tlawh nghal a. Hospital thuneitute pawh India mite mamawhnaah theihtawp lo chhuah turin a hrih a ni.

External Affairs Minister Dr. S. Jaishankar chuan vanduaina thlen hnu lawkah Kumait Foreign Minister Abdullah Ali Al-Yahya a be nghal a. Pu jaishankar chuan Kuwait thuneituten chhanchhuah hna ngawrh taka an thawk nghal chu lawmawm a tih thu a sawi a. Chhiatna thlen dan chu chhui anih tur thu leh mawhphurtute hrem ngei an nih tur thu Kuwait thuneituten an sawi niin Pu Jaishankar-a chuan social media ah a tarlang.

Hei bakah hian External Affairs Minister chuan ruangte hi India rama thawn haw vek anih theih nan Kuwait thuneitute hmala turin a ngen bawk a ni.

Vawiin hian MoS for External Affairs, KV Singha'n Kuwait a thlen hunah thil awmdan kimchang ennawn a nih tur thu External Affairs Minister chuan a sawi.

<><><>

PM

Prime Minister Narendra Modia chuan naktukah Italy-a G7 Summit-a tel turin vawiin hian Apulia khua a pan dawn. Sawrkar laipua Foreign Secretary Vinay Kwatra chuan nimin khan New Delhi ah chanchinbumite kawmin G7 summit ah hian India chu sawm ve a nih thu a sawi a.

Tun tum hi a term thumna atana Prime Minister anih leh hnua Prime Minister Modi-an ram pawn a tlawh hmasak ber tur a ni a. G7 Summit ah hian khawvel ramdang hruaitute nen an inkawm dawn bawk a ni.

<><><>